

– Nashti ekhe yakhasa te achhos koro! Akana ka khelas azhay ekh table. Ili ka ikalav akaya da yakh tiri, ta ka ikales pale tu miri yakh. Ama, me mangava te ikalav te duy yakha, sar tu ikalzhan mire, kalke romnyasa, kay lilyan tuke! Ka ikalav akaya da yakh tiri, ta te nashti dikhes po-but te romya. I o chhavo leskoro phenela:

– Shukar! Te ovel sar tu mangesa! Tu sinyan o thagar!

Pale mukela pes te marel les o dad ki tabla. Ov da nashti inandinela, kay leskoro dad ka mukhel les koro te phirel. O thagar ikalela akaya da yakh e rakleskiri, lela o duy yakha i thovela len anglal leste, ama o raklo nishto na dikhela i na zhanela kay o dad leskoro mukhela othe o yakha. I romni leskiri, kato dikhlas, kay o dad ikalela i duyto yakh da garek, nashti deyandisalili, lilas te pishtinel, te rovel sa sesesa. Shukar, ama o thagar kato shundzhas lakoro sesi, dikhlas la i prastavela, te hal pes lasa. I oy, so ka kerel, nashela te garavel pes lestar. O thagar mukhela palal late pe askeren te roden la, te arakhen la, ta sar romni te ovel leske. I oy da veche akariga, okoriga, garavela pes. Rovela ashal e rakleske. Na zhanela so ulo lesa. A o raklo tselo kurko bokhalo, koro, nashti te arakhel o drom, te irinel pes khere. Alo ekh chiriklo, achhilo leskere phikeste i phenela leske:

– Shun mande, te yakha si anglal tute! Pipine da hari po-shukar i ka arakhes len. Le te yakha i lazimasa ka zhas zhi ki len, ka helares len, ka thoves len tuke lengere thaneste i ka dikhes pale.

I ov da chuka kerela. Arakhela pe yakha, lela len, zhala zhi ki len, helarela pe yakhen, thovela len lengere thanende i lela pale te dikhel. Shtom phuterzhas pe yakha te dikhel pale, birden tsidindzhas te rodel e Gyulizara. Katkar phirela, kotkar phirela, nashti arakhela la. Dimi pale, leskoro dad rodela la pe askerentsa i oy garavela pes. O raklo arakhela lakere manushen i phuchela len:

– Kate si tumari chhay?

– A-a-a – phenena, – oy garavela pes! Amen da garavasa amen, soske to dad mangela romnyake te lel la, a amen te mudarel. Muklas pe askeren te roden la, te arakhen la, romni te lel la peske.

I ov da garek, ozverinla pes – bisim me yakha ikaldzhas, akana me romnya da li ka lel?! Te arakhav les, ka mudarav les!

Uryela pes sar choro i rodela pe dades da, pe romnya da, te dikhel dali si i zhuvli pash leste. Nashti arakhela la. A i Gyulizara kerela pes vechek sar mrush – moravela pe bala, doyka bari bal, moravela la. Uryela pes sar mrush, sar arapi kerela pes. Phenela: